



DEO OPTIMO MAXIMO
UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS

*manè discutienda in Scholis Medicorum, die Jovis vagesimâ-primâ
mensis Aprilis, Anno Domini M. DCC. LVII.*

M. ANTONIO CASAMAJOR, Censore
Regio, Doctore Medico, Præsîde.

An variis in locis tuenda sanitati valdè proficiuus ventilatoris usus?

I.



ER est fluidum tenuissimum, vix grave, sum-
mè elasticum, viventibus inevitabile quale-
cumque sit, globum terræquecum quaquâver-
sùm ambiens. Velut apotheca naturæ, chaos
est universale in quo natant singula ferè tri-
plices regni corpuscula simul confusa, Sol, & alii ignes,

A



aquam multam, olea, acida varia, sales, mineralia, ipsissimum aurum, ad æthera rapiunt. De animalibus vivis per aëra dissipatur assidue exhalans materia perspirabilis sanctoriana; horum excrementa aperto commissa aëri, citò resolvuntur in miasmata volitantia. Fecunda insectorum ova, numerosa quandoque spargi per aërem, experimento facili comperit immortalis Batavus Hippocrates (a). Diffantur calore mobilissima vegetantium principia, ut spiritus Rector fons odoris specifici: dispellit ventus plantarum semina, quæ, idoneum adepra solum, ibi demùm latè germinant; transfert genitales pulvisculos, appetenti pistillo generosè instillat. Fermentatio expellit spirituosas. Moleculas olei & terræ maximè attenuatas, sales volatiles, extricat putrefactio.

(a) Vid. Rectorianum, Chem. tom. 1. p. 261.

Ex omni-genis menstruis sic conflatus aër, atmosphæram appellare mos est apud Physicos.

Gravitatem atmosphære primus definire ausus est magnus hetruscorum geometra *Torricellius* anno 1643. Illustrarunt & perpolierunt torricelliana *Guerickius*, *Paschalius*, *Boyleus*, *Mariottus*. Pressio aëris communis in corpus humanum æqualis est vi columnæ mercurii cujus altitudo eadem ac in barometro, basis, superficies corporis; adeoque major est ipsius gravitas in corpora telluris centro propiora, quàm in ea quæ in montibus excelsis hæsitantur. Tempore anni medio & in homine mediocris staturæ, ultra triginta mille libras assurgit.

Aër fluidus & elasticus compressilis est pondere & frigore contractilis; expanditur calore & ubi levatur causâ comprimente. Tempore sicco, frigido, & sereno, majori gaudet elaterio, undè major barometri elevatio, corporibusque vigor. Adaugeti elaterii effectus prodit excalefactus sed simul incarceratus aër, ut constat exemplo ollæ papiianæ. Aëris elasticitatem optimos in usus adhibet physicus. Ignorantur condensationis & rarefactionis aëris gradus ultimi possibiles.

Elasticitas & fluiditas sunt dotes individuae aëris aggregati. Intrà fluentis aquæ interstitia tranquillè latent solitaria aëris moleculæ; ast ubi gelu constiterit acuto, simul adunantur elementa aërea, in mutuos amplexus ruunt, colligunturque in bullulas valdè elasticas & fluidas.

Aër est instrumentum efficacissimum quo imprimis univ-
ersa natura utitur ubique in omnibus ferè suis operibus
quæ perpetuò exequitur ; vix ullus est humor cujus non
immisceat se aër partibus : vix solidum undè arte aliquâ
educi nequeat. Fluida nostra aëre multo abundare *Boyle-
leanis* & *Halesianis* edocemur experimentis. (b) Cornu cer-
vi, calculus vesicæ, ligna duriora, tertiam circiter pon-
deris partem mutantur ab aëre qui ad hæc componenda
concreta, elementi instar conspirat ; adeoque ut soli-
dum inelasticum. Ignis anima, aër : flamma prunaque in
aëre clauso citò pereunt extinctæ. Absque aëre nulla po-
test fieri operatio chymica, si excipias, ut sentiunt alchy-
mistæ, lapidis philosophici materiem cujus maturatio res-
puit crudum aërem.

(b) Vid. D.
Hales, stat. vegetæ
cup. VI. & passim.

Germinatio & vegetatio nequeunt perfici in vacuo *Boyle-
leano* ; nive candidius flavescit & emoritur lilium. Suo mo-
do trachæis & tubulis capillaribus sugunt aërem vegetan-
tia : evincunt pulcherrimæ *Malpighii*, *Grewii*, & *Halesii*,
observationes.

Præsentis aëris auxilio egent animalia terrestria & aqua-
tica. Catuli, aviculæ, &c. Brevi moriuntur in vacuo *Boyle-
leano*. Aquis submersus homo perit defectu aëris. Pisces
sub glaciæ aut in aquâ undèeductus fuit aër, citò amit-
tunt vitam. Ova fecunda non excluduntur in vacuo. Ipsæ
chrysalides recentè natæ per stigmata respirant & spem
omnem recuperandæ vitæ deponunt, si oleo inunctæ, aëris
præsidio destituantur (c). Ut autem valetudo sana sibi con-
sulet, requiritur aër purus, renovatus, nec rarior, nec den-
sior, qui sanguinis circuitui promovendo planè sit idoneus.

(c) Vid. illustrat.
D. de *Reaumur*,
opus immortale
de insectis, pag.
401. tom. I.

I I.

D IDUCTIS & elevatis costis, depresso diaphrag-
mate, in omnem sensum ampliatur thorax, fit va-
cuum in pectore, minùs resistentes subit pulmones aër,
flaccidas distendit vesiculas pulmonales, complanatorum ab
axi dimoventur vasorum sanguiferorum parietes ; ac pro-
indè à ventriculo cordis dextro ad ultimos arteriæ pul-
monalis mæandros coronantes vesiculas *Malpighianas*, ex-
peditiori viâ fertur latex vitalis. Minimis venosis osculis in-
trâ cavas vesiculas aëreas patentibus, absorbetur avi-
dissimè reficiens spiritale fluidum quod depositâ naturâ

elasticâ pervenit ad sanguinem intrâ cuius interstitia nidulantur solitariae aëris molecularæ, non secûs ac in aquâ corrente. Viam è vesiculis pulmonaribus in vasa sanguifera, & ex his in illas facilem, patere, herculeis comprobatur experimentorum & rationum momentis. Flatus in fistulam pulmonalem, tubuli ope, immissus, venas pulmonales saccum & ventriculum sinistrum pervadit. In animalibus strangulatis, aquis submersis, ater reperitur venæ pulmonalis sanguis qui mox, flatu per trachæam, coccineus redditur. (a).

Iniiciatur liquor tepidus in arteriam pulmonalem, dum arte perficitur respiratio vitalis, liquor penetrabit ex arteriis minimis in venas, ex iis in sinum, auriculam & ventriculum cordis sinistrum, tandem per aortam exibat: intrat simul in bronchia & trachæam arteriam. Par erit successus si per venam pulmonalem liquor injiciatur, it per venas, transit per arteriam pulmonalem in ventriculum cordis anteriorem & saccum dextrum, paulò post ex ultimis parulis venularum osculis penetrat in bronchia & asperam arteriam (b). Perperam accusaretur diffractio vasorum quæ fuerunt tantum dilatata.

Sanguis à ventriculo dextro trusus in arteriam pulmonalem est merè venosus, fluit per venas pulmonales arteriosus coccineo-ruber. Sanguis venæ pulmonalis anthliæ pneumaticæ submissus, multum aëris supeditat. . . . Sanguis venosus aëri expositus, colorem floridum arteriosum citò induit. . . . Quid plura? præsto sunt morbi Epidemici aëris vitiiati inspiratione, sæpius procreati.

Inspirationi succedit expiratio: costæ deprimuntur, attollitur diaphragma, arctatur thorax in omnem sensum; hinc validus in pulmones nifus. Complendantur vesiculæ pneumonicæ, pars aëris cum rore tenuissimo volatili ab arterioliis intrâ has sudato sub formâ halitus tepidi foras propellitur. E venis pulmonaribus in antria cordis posteriora exprimitur sanguis spiritali liquido ditatus, in minores solidiores sphaerulas discerpitur; tanquam pistillo aëris mechanico atque pulmonum torculari contritæ chyli lymphâ divitis molecularæ, pinsuntur, subiguntur, comminuuntur, & brevi cruoris naturam & densitatem induunt: insuper cum sanguis quadragesies, circiter velocius moveatur per pulmones quam per muscutorum arterias ejusdem animalis, *

(a) Vid. celeberr. Professoris D. Ferrein, eximium Theſin Med. Par. 1738. *An actio mechanica pulmonum in fluida tempora expirationis sit?*

(b) Vid. Abrah. Kohn, de percipitatione Hippocrati dictâ pag. 196, & seq. Vid. etiam elassif. prof. Monfp. D. de Sawages, dissertationem de effectibus aëris in corpus humanum att. 1754.

* Vid. D. Hales *Barometrical exp.* 100.

cruor & chylus tantùm patiuntur à pulmonibus quantùm ab omnibus visceribus & toto corpore reliquo : undè sicut cor præcipuà sanguinis anthlia , ità pulmo princeps organum hæmatopœum. Ex dictis liquidò patent aëris usus & efficacia.

I I I.

IN T R A debitos naturæ cancellos nō servantur aëri puritas , elaterium simul & pondus , nequit consistere recta valetudo. Thermometri & barometri mutabilitatem plus minùs ve experiuntur corpora sublunaria. Quando solvitur acris hyems gratà vice veris , & favonū , nimum constricta paulisper remittuntur vasa , torpidi moventur humores , à sordibus defæcato redit agilitas corpori , menti serenitas. Ast ubi syrius ardet , infringitur solidorum tonus , affat sanguinem calidior aura , ex impuro fonte impuri diffiunt rivuli : hinc seges morborum quos exasperat instabilis autumnus.

Tempestatum vicissitudines non modò subit aër , variis insuper potest vitiari causis. Depravatur aër non renovatus. Avicula in recipiente magno , aëre communi , pleno , sed quàm accuratissimè clauso , intrà horæ quadrantem ægrotat , vomit , post tres quadrantes moritur. Piscis in vase clauso , in aquâ , sine renovatione aëris brevi perit. Ovula quorumcunque insectorum , semina plantarum , licet requisito excitata calore , in vitris accuratè clausis , non dant vitæ ulla signa actuosæ. Ubicumque magnus hominum confluxus aëris intoxicatio mutvenda , & ad auram frigidam captandam vel invitos cogit æstuans calor ingratus. In infimo navis tabulato diù manere nequeunt operarii , quidam citò cadunt in lipothymiam : inibi lentè consumitur accensa candela , flammâque luridâ corruscat ; quin mox extinguatur si à longo tempore non fuerit renovatus aër , viciataque stagnet aqua.

Homini noxia quandoque commiscuntur aëri corporum effluvia. Fodinæ cupri , plumbi , arsenici , cinnabaris , &c. mortiferos eructant halitus infelici connubio sese maritantes aëri. Insulæ ternatæ cives batavi , nonnè diris conflictati fuerunt morbis , ex quo diruerunt caryophylla quorum benignus vapor vicinorum locorum pestiferam exhalationem emendabat ? * Paludes copiosa insectorum , vegetabilium , &c. Seminaria , desidibus aquis contaminatæ , refractarias achyllæo cortici peruviano febres quartanas progerminant ,

* Vid. Encyclopæd. tom. I. art. de l'air.

traduntque letho corpora macie confecta, variis pustulis atque exanthematibus foedata, nō mutetur æquo crassior infensus aer humidus (a). Quid enarrabo de famosi Italiae specūs dicti *grotta del-cane*, putei *perauls* propē monspelim, reterrimā mephyti animalia confestim suffocante? Quid de caveis profundis à longo tempore aëri imperviis? Quid de tumorum, cellarum vinariarum in quibus fermentant liquores, lethifero gas aëris puritatem & elaterium destruente, non secūs ac sulphurei vapores? At cordatum Medicum magis adhuc movet Nosocomiorum plerorumque fors mærenda. Ibi colliguntur sordes omnigenæ: variis agrorum vitiatis excretis, perversis medicamentorum particulis, inquinatus aer non renovatus, morbos curatu difficiliore procrastinat; frequentius convalescentes recidivam patiuntur immedicabilem, nec prosperè succedunt operationes à Chirurgis aliundè solertissimis celebratæ. Quid si contagiosis & septicis variolarum, pestis, dysenteriae, &c. volatilibus moleculis conspurcetur aer? Quot exindè strages non ederent affusa sanguini virulenta miasmata (b).

(a) Vid. omnino curiosum *Lancij* librum de noxiis paludum effluviis.

(b) Vid. aureum *Tippoer.* librum de aëre, aquis, & locis.

Vid. de his pulcherrimè differentes sagaciss. & doctiss. D. *Pringle* & *Huxham*, de morbis exercituum, & de morbis epidemicis.

(c) Vid. optimorum virorum D. *Mead* & *Lind*, de febribus tractat.

In navibus ut & in Nosocomiis plurima mortalium capitibus impendent mala. Perpetua loci humiditas, obsoniorum dotes, variis de causis insalubris aer, plures morbos at imprimis gravem scorbutum producant (c).

Perniciosissimus est fætor carceris qui captivos diū, arcè, & squallidè habuit. Nostri pariter ac magni *baconis de verulamio* temporibus carcerem Newgatensem perhorrescebant iudices londinenses, ob impurum valdè non renovatum aërem.

I V.

VIX ullus agrotantium in Nosocomiis, navibus, carceribus, vitaret libitinam, ni stagnanti aëri putidisque miasmatis inquinato, applicaretur certa medela. Ligna super foco per totum anni curriculum reponit Batavia paludosa. Naturali instinctu adaperiuntur fores, fenestræ, quò diluatur infectus aer. At his non evellitur radicibus causa malorum.

Aërem vitiatum penitus emendare tentarunt philosophi cives, patriæ & sæculi ornamenta. Edoctior & certior ætas excogitavit ingeniosa, duro nodo parem cuneum adhibuit. Excellentissimus D. *Hales*, quem hominum bono scientiis

que promovendis natum jure prædicant omnes, *ventilato-rem*, machinam simplicissimam ex omni parte laudandam, perfecit, variisque locis & usibus accomodavit. Adeas fontem, ipsissimi D. *Hales* opus egregium (a). Hic reperies peramplam ventilatoris descriptionem, utendi modum, &c. quibus superfedeo ob strictiores thesicos limites, præsertim cum verbis tantum hæc vix capi valeant. In Nosocomiis, carceribus & navibus ventilatoris D. *Hales* maximam utilitatem testatur tanti beneficii haud immemor anglorum animus.

Exantlandi è navibus infectum aërem eodem innixi principio simul rationem inierunt ingeniosi viri, noster *Hales* D. *Duhamel*, & D. *Samuel Sutton* Anglus. Culinis navium gallicarum apprimè convenit *arca ferrea* à D. *Duhamel* inventa (b); culinis verò Anglicis *tubi Suttoniani* (c). Præstat tamen *Halesianum ventilatorem* adhibere in navibus, quippe otiosis nautis exercitium utile ministrat.

D. *Duhamel* coronâ civicâ donandus, eodem quod navibus aptarat principio usus est in Nosocomiis aliisque locis infectis, habuitque eundem successum quem experitur bono suo Nosocomium Lugdunæum (d).

In Nosocomiis instabilibus exercituum decipula sufficit in summo cameræ tabulato.

D. *Desaguliers* rotam centrifugam olim in fodinis ab agricolâ usitatam, uni è Tribunalibus Londinensibus (e) cum fructu adaptavit (f).

V.

NULLA secum trahit incommoda *ventilator*, & ex illius usu qualis emergat fructus patet jam ex dictis, & ex monumentis gravissimorum virorum qui rem oculatiùs perspexere. *Follem Halesianum* præ cæteris adhibuit illustri D. *Duhamel*, ut præcaveretur frugum rancida humiditas (a). Si fides celebr. D. *Mead*, singulisque navium præfectis, non tot ac antea agrotarunt nautæ, rarior fuit scorbutus, dum ventilatore aut hujus vices supplantibus arcâ ferreâ D. *Duhamel* in navibus gallicis, aut tubis Suttonianis in Angliâ, publicæ rei administratorum jussu fuerunt munitæ naves. Ex quo tempore ventilatur carcer Newgateus ope folliis *Halesiani*, captivos tutò invinsit impavidè nunc iudices & Medici Londinenses. In Nosocomio inoculationis Londini tam sapienter constructo, nè

(a) Vid. descript. ventilatoris D. *Hales*, opus transcript. à D. *Demourie*, in 12. pars. 1744.

(b) Vid. Act. Acad. scienti. par. ann. 1748, à pag. 1. ad 8. cum fig.
(c) Vid. novam Method. exantlandi aërem è navibus opus transcript. à clariss. D. de *Levoirre*, Paris. in-12. 1743.

(d) Vid. Act. Acad. suprà citat.

(e) La Chambre des Communes.

(f) Vid. exp. D. *Desaguliers*, addita in op. transcript. à D. de *Levoirre*.

(a) Vid. opus anodum utile de frumenti conservatione, 1746. in-12. 1753.

minimùm quidem nares percelluntur ingrâtè, licet ex ægris perpetuò avolet virus scepticum; quod debetur ventilatori. Hæc audiivi à pluribus viris fide dignis inter quos nominabo familiarem collegam D. *Mauslatre*, ab aliquot mensibus è Londino reducem. Exhinc etiam deducitur, ut properans dicam, aëris novi & puri necessitas in ægris variolis, &c. laborantibus, contrà quod sentit profanum vulgus. Dum novus appellitur aër, refocillatur æger æstivans ingrato loci calore; si tamen sudor criticus superveniat aut expectetur, otietur ventilator, etenim pro lubitu movetur sive agitent homines, aut quadrupedia, aut ventus.

Cùm *ventilatoris* commodum abundè liqueat, nonnè mirum videtur quod in variis galliæ Nosocomiis & præsertim Parisiensibus vario morborum genere laborantes complures ægros concludentibus, & ubi infecta miasmata vix perferre valent vel maximè assueti viri, non constituitur perutilis nec sumptuosa suppellex? Solum reperire est in galliâ Nosocomium Lugdunæum aprico aëri patens, spiramentis vapores noxios sugentibus, & ultrà transmittentibus, instructum. Cur non ventilantur ope machinæ propositæ carceres in quibus captivi perpetuò respirantes è corporibus sæpè morbidis diversimodè inquinatum insaufis vaporibus aërem, citâ morte præcurrunt diei persolvendis facinorum pœnis definitæ (b)? cur in navibus pertinaciter servatur velum conicum, dum potior multò constet utilitas ventilatoris qui insuper obsoniorum corruptioni præcavendæ est quàm aptissimus. Cur in locis clausis ubi frequentes conglomeramur homines non adhibetur ventilator cujus successus minimè dubius est. Hinc veri cultores, humanique generis bono devoti, ratione, autoritate, & experientiâ freti, meritò concludimus.

(b) Nuper illustriss. D. *Eger*, vigilantissimus Decanus, supermi senatus, &c. Medicus ordinarius, loco dicto *Tour de Monsga-mery*, curavit ventilatorem adhiberi: ex voto cessit optimum consilium.

Ergò variis in locis tuenda sanitati valdè proficius ventilatoris usus.

Proponebat Parisiis LUDOVICUS-MARIA GIRARD DE VILLARS, Lucio-Pictor, Doctor Medicus Monspeliensis, Collegii Regii Medicorum Rupellæ Socius, Saluberrimæ Facultatis Medicinæ Parisiensis Baccalaureus, Theſeos Auctor, A. R. S. H. 1757.

A S E X T A A D M E R I D I E M.

Typis Viduæ QUILLAU, Universitatis & Facultatis Med. Typogr. 1757.